

四庫全書

集部

欽定四庫全書

集部
南陽集卷二

詳校官庶吉士_臣范逢恩

檢討_臣何思鈞覆勘

總校官進士_臣朱鈐

校對官待詔_臣胡士震

謄錄監生_臣沈啟晉

欽定四庫全書

集部三

南陽集

別集類二 宋

提要

臣等謹案南陽集三十卷宋韓維撰維字持國潁昌人絳之弟也以蔭入仕英宗朝累除知制誥神宗即位為翰林學士元祐初拜門下侍郎以太子少傅致仕紹聖中坐元祐黨籍謫均州安置元符初復官卒嘗

封南陽郡公故以名集事蹟具宋史本傳陳振孫書錄解題作二十卷稱後有其外孫沈晦跋前有鮮于綽所撰行狀此本凡詩十四卷內制一卷外制三卷王邸記室二卷奏議五卷表章雜文碑誌各一卷手簡歌詞共一卷附錄一卷較陳氏所載多十卷疑陳氏訛三十為二十鮮于綽所撰行狀今與沈晦跋並列卷末亦與陳氏所說不同然目錄仍以

行狀列卷首則傳寫者悞移之也其第十九
卷二十卷稱王邸記室立名頗別考邵伯溫
聞見前錄稱神宗開潁邸韓琦擇宮僚用王
陶韓維陳薦孫國忠孫思恭邵亢云云蓋維
于是時掌兩宮牋奏所作耳其集刊版久佚
藏書家轉相繕錄訛脫頗多第三十卷與附
錄一卷尤顛舛參差幾不可讀蓋沈晦作跋
之時已云文字舛駁不可是正今流傳又四

五百載其愈謬也固宜矣謹考定其可知者
其原缺字句無可校補則姑仍其舊焉乾隆
四十六年十月恭校上

總纂官

臣紀昀

陸錫熊

孫士毅

總校官

臣

陸

費

墀

欽定四庫全書

南陽集卷一

宋韓維撰

古詩

答范景仁歎花花在相國寺近舞場

佛宮金碧開朝霞遊人雜還來正譁危絃促管競繁咽
羅袖對舞春風斜子時投閒一徃步正見綠樹團丹花
舉頭驚看不忍去却視妹子猶泥沙稍開欲謝各自好

似為悅已為容華歸來想像入秀句刻綴玉珮鏘珩牙
尚嫌獨賞不盡意邀我共賦雄其誇欲將奇警謝妍麗
力竭未有錙銖加急須取酒趁殘艷猶勝落盡乾咨嗟

觀龍和謝師厚

龍於經傳皆有云明幽其德能屈伸嘗聞於耳昧厥真
乃今覩之信所聞層陰填空白日昏仰見巨尾垂輪困
其長百丈圍車輪髣髴如辨鬣與鱗腥風蕭颯來逼人
觀者駭伏褫魄魂須臾搖動捲縮雲雲氣斷岸隨飛奔

驚雷下震萬瓦裂暴雨一瀉羣河翻霆收無迹雨在物
吁龍出處何其神

講武池和師厚

滄池擬演渤莽漾豁厚地日吾神祖為氣象固宜爾六
合昔未一教戰出精銳至尊降黃屋慘淡乘金氣凌波
飛百艘撒烈若鷗翅揚旌萬旅譟伐鼓九淵沸其行速
天旋其止甚陰閉信乎王者師足以服睽異爾來承平
久地與兵革廢秋風長蒲葦爛漫失洲沚惟見金明上

結構銷繡綺春遊駐天蹕萬國奉燕喜鏗鉦鼓鐘響雜
逌羽旄美豈惟與民樂施及魚鳥細宏哉艱難業愉懌
逮萬世

答蘓子美見寄

暮春遊京洛適與夫子邁衣焦未及展挈酒且相就佳
林延涼飈廣厦蔭清晝浩然塵慮醒坐看天骨秀殷勤
述平昔感歎道艱疚談辭足端倪懷抱去蒙覆志願始
云獲睽携遽然又君舟既南馳我馬亦東走還譙寡儔

侶孤學日以陋高風邈難親離抱曷其救得君別後詩
滿紙字騰驟汪洋莫知極精密不可耨峻嚴山岳停奔
放江海漏伏讀晝夜并文義僅通透有如享太牢繼以
金石侑惟君抱雄才文字乃兼副要當被金甲獨立諸
將右指揮神武師為國縛狂寇獻俘天子廷功以鐘鼎
鏤勉哉俊其時此論講已舊

送趙員外之官憲州

仲扶岷峨秀弱歲儒其冠讀書觀前古飽見萬事端行

已去畦町為文鄙彫剜應舉二十載不免瓢與簞西游
秦函國崆峒上嶺岼却視關塞廣有如掌中九攻守勢
所利浩然入窺觀是歲羌事作賊兵犯廊丹君懷濟時
畧忠憤激肺肝上書伏兩觀音辭若琳玕臣策倘見用
坐令敵氣殫天子壯其語且使位以官黃綬繫腰下行
行不遑安炎天風塵多遠道車馬單餒觴不親酌曷致
朋友懽今茲塞垣將所在麾旌攢孰能謀而殺孰能正
以寬孰用賞不信孰為刑不殘諒非專達任易以奇畫

千庶幾成大功
展子凌霄翰
顧我頑鈍者
託契歲屢寒
贈言非所工
當否聊一看

遊北臺

南譙古佳郡
四郊富登臨
晨躋北原上
却視渦水陰
云昔魏太子
離宮構嶽峯
故事邈已遠
荒臺猶至今
危亭冠其巔
左右背長林
是月暑尚盛
秋行不能金
截然天地間
軒戶蕭以森
涼風泛廣坐
濁醪時一斟
圓歌貫珠璣
麗句鏗璆琳
雖無管絃樂
所要在適心
中宴下危磴

浮舟事幽尋披藻出潜蚌回撓散游禽岸長草不斷城
轉樹更深沙紋與水影浮動光差參游鱗不知數瑣細
如糝針四顧物色靜但聞天籟音羨此魚鳥性雲飛而
淵沉安得高世士不為時好侵相携去韉鎖投竿坐清
澗製芟為我裳紉蘭間予襟上歌唐虞道寄適朱絃琴
人生苟如此何必組與簪

和三兄之山陽省孀姊書懷

君子蹈仁義近自親愛始當行豈顧留千里猶舉趾伯

氏有東役駕言適淮涖離罇未及展濁醪未及灑起視
白日移驅車一何駛遵塗驪唱發春風落端綺義參成
周作辭追建安軌感此留滯迹一誦三四起安得假羽
翮遠慰心所企此志良未遂洒泣詎能已

答王詹叔見寄

詹叔好古者卓立自既冠有如騏驥兒一縱不可絆近
間治周易顛倒爻象彖此書號精微義與天地貫吾知
子之道不止今所歎新詩溢巾幅見寄警庸懦噴薄百

丈泉峭絕萬仞岸感激氣為振把誦手屢盥陰風吹寒
城歲暮雲物換丈夫及壯時功名當照爛無為但默默
飽食大軀幹為報乏瓊玖君其取章斷

送曹殿丞秩滿還都

朝日照濠水清霜發樹寒長橋下廣陌車馬來嘽嘽借
問行人誰送者何盤桓中郎罷從軍遺愛民所歎雍容
幕府舊供帳清渦干悲風思急管薄暮留征鞍酒酣惜
分手四坐慘不歡長河轉轍跡愁陰但漫漫嗟予隔追

餞飲此離恨端高標邈難親坐向飛鴻看嘗聞古君子
贈言當豆簞願君保亮節歲晚予其觀

與張仲巽遊善護院

高城面脩塗呀豁若箕口其右釋子廬蒼栢蔭庭牖翹
翹幕中彥疎懷脫喧垢結轡游禪局彈絃樂嘉友華棖
翳廣坐仰視眩丹黝朱光羞晨櫻紺玉折春藕初筵頗
清簡中醉稍喧糅歌休衆管作令發洪鐘叩橫浮或見
違義蘊

閑

酒酣隘常見大觀資遠取上躋危磴盤

金方尺八
卷一
却立土崖斗長川自西來逶迤帶坳數綠樹下成列獵
獵清風走側身宇宙羣動何紛糾自顧齷齪極天地
一罌缶安得修靈根超然出諸有

春夜懷仲巽

今茲春始仲氣序忽已燠及此暇夜清開軒散煩蹙金
波麗中天流光正穆穆佳樹澄疎影幽花運微馥濁醪
時獻斟清論逋徃復諸季豈不歡眷眷心所服高文炳
辰宿淵議贊化育匪才託遊好餘潤久霑沐茲焉隔清

賞耿耿私恨蓄春芳正可樂嘉會期晝卜

寄蘓子美

暮登譙城上延首望東道春風千里至遠思生懷抱故人客南楚素節方自保黃鵠垂其翼赤驥伏棧阜詩准李杜為字壓褚薛倒壯哉南行作遺我資遠討若窺巨海涯波瀾方洶浩龍螭鬱騫騰錯落效衆寶徃徃仙人槎突然忘枯槁嘗聞會稽旁山水天下好覽君所詠嘆滯想茲一掃安得追王喬乘雲逮霓僚茹芝靈峯陽徂

金匱要略
卷一
律以終老

初春吏隱堂作

微風稍破凍芳萌亦吐林百鳥感春陽鉤輅弄其音振
策遵城曲逍遙寫煩襟愛此堂下石青潤挺琅琳中坳
貯清泉測之不盈簪纖鱗候暖戲寂歷自浮沉默視澹
忘慮白日為移陰人生本虛靜垢濁無自侵忽為外物
牽至性不可尋於焉得所監一洗塵中心

立春觀杖牛

清霜涼初曙高門肅無譁行樹迎初日微風轉高牙
辰亦何辰見此氣候嘉有司謹春事象牛告田家微和
被廣陌纓弁揚蕤葩伐鼓衆樂興剡剡綵杖加盛儀適
未已觀者何紛拏因思古聖人時做在不差禮實久已
廢所重存其華吾非魯觀賓胡為亦咨嗟

魯恭太師廟

善教邈無跡其流在民心君看魯太師廟食猶至今豈
如文俗士朱墨坐浮沉趨營止目前不顧患害深去漢

餘千載此弊竟相尋
我行道祠下感激為悲吟
不見田雉馴啼鴉空滿林

服除送兄弟還都

日月忽已遠再見新穀升
喪期有常數吉我衣與襟俯
仰自悲咤淚下肝膽崩尚推
立身報未即泯餘生肅肅
忠憲公秉德輔休明報國有
遺意訓言猶在聽況茲世
厚恩兄弟秩王庭一朝出門
去事業各自營上當答君
仁下以為親榮獨此抱痾瘵
謝暄守柴荆掃冢奉時祭

履田課春耕既無公家責聊徇狷者情出處雖云異要
以道為程

送兄弟還都至長葛河上四首

雙禽

雙雙河洲禽文彩披丹質飛翔不離渚鳴戲自終日寒
魚伏冰池歲暮饑爾匹不欲遠求林投身避羅罽

晚步

愛此霽景佳捨舟步高岸夕陽照渡口急急水紋亂霜

金匱要略卷一
鷗田間鳴沙鳥波上散登臨豈非美當軫別後歎

舟中夜坐

晴霜落波底斗柄插提外扁舟燈火明樽酒夜相對臨
歡意暫遣念離心已痾篙師喜冰拆理楫事晨邁

別後作

朔風吹驚鴻行列失後先蒼蒼雪壓船齒齒冰著岸離
馬聲正悲別臉淚猶泣却望攜手處危檣映林見

靈溝道中

久跼慕遐放出郊欣所矚清心曉岫碧豁眼春原綠
人畢在野鳴鳥催播穀嗟爾農事勞願間時澤足

西園暮雪

空園響松竹霰雪霽霏霏仰視長雲色皓然同一輝
天寒鳴雁急日暮行人稀惟見衆小禽啾唧滿林飛
陰風起何處拂拂來吹衣俯念當世事幽憤不可揮
歸來散羣帙獨掩袁安扉

東窗

高窗不掩秋氣清下見瓦沼涵泓澄雨洗浮萍翠色靜
青叢綠蔓相纏仍堦前童童兩好樹上有鳴禽不可數
杖藜書生愛苦吟獨立西風無旦暮

曉霽

時澤鬱初霽朝景爛已盈幽人獨坐久春鳩相應鳴清
風動佳樹平地泛落英方懷歲成喜況值茲賞并

新置北軒

紛敷北軒植移劇來中園微雨一飄灑咄咄芽蘂繁輕

黃吐雙蕉寸碧羅叢豈更憐二棕櫚遠結蜀土根清風
落簷楹翼羽何翻翻惟此松竹姿洒然出塵昏衆芳自
爭妍正性中獨存願秉歲寒操翠色藹君軒

放魚

時哉清川魚罹此鉤網牽稚子捧盤至鱗采金翠駢一
感仁者意泳我清冷泉晨跳翻綠萍暮息依白蓮脫身
刀俎間永以終爾年唯昔鄭國僑亦嘗歎悠然以方斯
可欺孟子稱其賢永懷古人懿屢歎春風前

金華四子集
卷一
次韻和三兄田家

東臯雨新足綠野對柴扉晴日風景曠暮日草木肥好
鳥依林響疲牛望舍歸餉婦散田陌桑間人語稀

村居曉起

天星何寥寥野曠風露清田父出門望山鵲遶舍鳴蠶
桑從此起農里各有營顧慙不耕者日宴掩茅衡

秋雨南堂即事

南堂秋雨清竹樹變愁靜微寒病體蘓燕坐塵事屏高

林岷已落鳴雁去方永何以消沉憂予心在箕穎

和子華許昌道中詩有隱逸之思

悲風中夜興寒氣入我室頽然攬衣坐中懷百憂溢我
生乏壯圖少小事刀筆窺古得微尚趨時寡良術野性
不受羈塵事憂見桎况茲罹大難哀號重衰疾生意且
蕭瑟何必慕祿秩風俗日以惡險詐路百出素昧防閑
術覩此實怖慄安能徇時好嘒嘒喪天質所賴子華兄
志尚古人匹新詩來聯翩意韻時高逸中畫歸休計羅

列甚詳密雅懷蕭洒心期言倘能必便當奉几杖相與
安蓬葦薄田能力耕歲計猶不失結廬守松楸築圃藝
柿栗雞豚燕嘉辰魚釣樂暇日讀書取知道白首窮經
一甘從野儒事庶保幽人吉咄哉軒冕徒校此孰勞佚
奉寄汝守仲儀舅

嘗提十萬師為國扞羗寇嚴兵坐大府諸將無與右旌
纛儼成列鐘鼓振前後曰賞固自我有誅孰敢救勝勢
前已決威聲日西走功名未及建得此山城守捧詔顧

東路怡然引車就窮秋過舊許整駕一來觀高談不知
疲輒用火繼晷卒無愠黜端少以顏色漏乃知君子心
得喪不自囿悔非自取之於道有不受徒然頌德美洪
量詎窺究孤城俯清汝山勢遠相鬪公庭日無事燕坐
陰華構林寒山雪飛地靜玉泉漱於茲樂天理足使道
牙茂時寄新詩章窮閭慰衰疾

蘓才翁與予定林下之約今被命提點湖南刑
獄恐其侵尋而不能反作詩貽之

軒冕子已輕山水君所樂相逢說高興南望欲奔趨今
君被國恩明刑弼予教羣公許風稜列郡瞻氣貌朝廷
方急才懸爵待明效美官誠足慕素約未宜撓當懷平
生言拔足利名罩笑謝世俗人夷猶五湖棹

寄宗彥姪

清寒霽愈劇幽居夜正閒環爐盡兄弟無為愁苦顏游
心物象表放論文字間念汝不與此慨然以長嘆唯昨
郭西門爾車去班班是月秋始仲霜葉原上丹相別曾

未幾朔雪滿河關乃叔疎野性雅慕詩考槃近買靈溝
地郊居漸當安薄宦奚足為真隱庶可攀斯言倘汝志
投紱相與還

歲暮

高風動河漢肅肅下陰霜起視夜向艾華星粲相望犬
吠閭巷靜哀鴻正南翔歲暮已多感及茲重成傷

送王氏兄弟

抱疾伏田里晨昏結煩憂如彼衣上垢歲久不可漱忽

聞車馬音來過吾廬幽相見一長慟悲風為遲留張燈
具餐飯涕泗稍復收南堂夜相對油然破離愁雖無盈
樽酒清論代獻酬高篇璨成誦輸寫殊不休婆娑雙鳳
凰飛舞光彩浮忽然變瑰怪風霆拔金蚪傾聽魄已悸
何暇測其由君家門閥大先世勤令猷晉公典冊文太
尉廊廟謀子孫今多才信矣陰德流還轅欲何語贈子
詩聿修

讀杜子美詩

寒燈熠熠宵漏長顛倒圖史形勞傷取觀杜詩盡累紙
坐覺神氣來洋洋高言大義經比重徃徃變化安能常
壯哉起我不暇寐滿座歎息喧中堂唐之詩人以百數
羅列衆制何煌煌太陽重光燭萬物星宿安得舒其芒
讀之踴躍精膽張徑欲追攝忘愚狂徘徊攬筆不得下
元氣混沌神無方

王詹叔惠酥

興平產良酥厥品為第一歲時盛獻饋霜梨副冰蜜東

金匱要略卷一
來連車軫並走衛霍室盤筵得此物主意自為畢詹叔
官西州遺我資口食甘知馬酒薄素覺驚肪失我今農
里人藜藿度閒日多慙擲嘉味徒用飽仁術厚意如何
報還持況賢質

讀信陵傳

周綱亂無紀羣雄事吞爭猶能假仁義以勢相奪傾是
時賢公子信陵最知名招搖大梁市攬轡御侯嬴義勝
下子色恩重忘彼生竊符連王姬奮鉞遺國兵救趙意

何切於魏情已輕賴有毛薛在終然臣節明

又靈溝道中

春風來無迹決莽天地和羣生樂時陽衆鳥舞且歌嗟
爾道旁叟寒餒獨見羅短席不自蔽皮骨撐枯柯呼童
問所以口噤不能哦所見且如此況餘生齒多吾聞古
三代仁術固匪他老幼孤洎疾餽養平不頗斯道久寂
寞吾悲其奈何

種栢寄蘓子美

人皆種花我種栢為此勁性寒不易三春雖憐少姿媚
歲暮方看靄顏色南堂之南可數到列樹六本翠磔磔
安得驛使向姑蘓持以贈君比明德

感季夏南堂懷江十蘓二

積雨漂暑餘涼風作秋先南堂草木深蟬蛭嘒籬掾感
此時節流坐傷人事變去年居京華晨昏侍親燕問誰
過我頻江蘓實邦彥一朝艱禍纏銜哀走窮縣形骸悲
瘵中氣息僅如綫鄰幾謫宦云門征校虧羨子美亦遠

遊江湖一蓬轉人生哀樂間瞥若過目電念此不敢已
淋漓淚垂面二君希代寶寧久世俗賤天和酌無竭玉
德莫愈見何以慰相思酬篇佇來綯

覽梅聖俞詩編

夙昔誦佳句跂予慕高風何意憂艱餘邂逅此相逢君
初應府辟捧檄來自東引車窮簷下眷然顧微躬姿表
穆以秀純德信內充乃知文章作中與性情通煌煌新
詩章垂光照昏蒙啟櫝挹荆璞引筵撞景鐘高篇屢云

關遠思殊未終譬如巧琴師哀彈發絲桐中有沖淡意
要以心志窮顧惟昧者聽莫辨徵與宮安得牙曠手提
耳發其聰

西墅

城居不為愜言適西陂岡雀噪野堂靜雞鳴春日長書
棚落幽蠹佛幔掩餘香釋子廬巖至清談殊未央

對雨思蘓子美

五月陰盛暑不效飛雲日夕起嵩少回風颯颯吹暮寒

翠竹黃蕉雨聲鬧北軒孤坐默有念人生會合那可料
昔與子美比里閭是月秋近足霖潦吾徒無事數相過
日策疲馬度深淖升君之堂伏君几果餌羅列亦稍稍
開樽得酒味已酢輔以諧謔聊可嚼長歌激烈或孤起
大論紛紜特一譟颯然夜氣變淒栗連披短褐曳顛倒
且欣主人同氣類安問鄰家厭呼笑而今相望各千里
跼促有如魚在罩人生此樂不易得世事榮辱何足校
行當結侶候春水一訪洞庭湖上棹

出郊古意

跨馬長林下落葉填荒溝嚴霜熟秋實野物畢以收空
場委餘穗雀鷄鳴相求仰視鴻鵠羣肅肅摩天遊清風
下哀響靜聽令人愁時序迭而去曾不與我謀小人急
趨利君子懷德憂

和三哥入山二首

巢由沒已久風迹曠不嗣長嘯箕頰間悲風肅然至傳
聞龍山下茅屋架三四中有隱者棲讀書樂仁義飽觀

人事變深鈎易象秘畊田給衣食鄉里霑賑遺呦呦山
鹿羣摩撫馴不畏乃知至仁心足以通異類聲名自馳
擊我心晏無累寤寐想斯人安得同所致

山林

長林翳空谷茲惟羣材府石路險且躋不為斧斤取火
雲無時蒸衆葉朝自雨仰視不見末飛鳥安得度下有
靈藥草其品難記數駢然花實繁紅紫貫四序霜風落
橡栗投擲地虺怒過巔林更深欲前防猛虎

郊居值雨

愁雲覆西郊，氣象淒以冽。
夜雨朝不止，冰霰相纏結。
南堂何蕭條，散秩坐超忽。
頽然附爐炭，兩髀冷如鐵。
俯念田家苦，罹此寒事切。
北風卷平野，茅屋左右穴。
驅牛入門去，爨下火明滅。
場功始云畢，貧不具衣褐。
况無酒與羔，歲時相勞悅。
高詠七月詩，傷哉愁心折。

答江鄰幾

君雖宦遊者，閒適意有餘。
平居對樽酒，口誦離騷書。
援

琴寫其聲世事皆蔑如不知萬乘相可易此樂無諸詩
來不竭若有神物輸予病廢學久腹中日空虛苦遭大
敵壓便甘等縲俘清風濯我圃竹樹相傾扶益之以佳
雨清涼如可斟聊休據梧暝且復帶經鋤鳴鸛久不去
乳鵲時驚呼即此良自逸安知城郭居此與君不淺相
望重躊躇

崔象之携長詩示予且欲以瘿木樽相付作詩
謝之

君家癭木樽醜怪不可狀自非好事者棄置等盆盎作詩一千言引類何其壯且思高世士遺以資雅尚曰予林壑性受此頗宜當我今衰病餘卷縮就閒放才非時用宜茲器正相況敢邀高世名自觸譏與謗再拜謝佳意君何授之妄

奉答吳殿丞見贈

勢利躍諂子聲名走夸兒我於二無一世固背以馳君從江海來面有蕭洒姿朝廷多舊游絕迹不復追足音

三及門乃得衆所遺長篇爛盈目清遠謬見推將非樂
閒放獨與靜者宜何以謝嘉况湖山有前期

從道損舅乞移山藥

弱歲抱衰病好讀神農經雜然衆藥品猶識性與形商
於巖谷間厥產芝朮菁山家乘冬採氣烈味亦并常思
負籠往劖此地氣靈近聞山旁縣移本來公庭石泉尚
含潤溪風有餘清想像春叢數蔚蔚揚華英駢羅良可
佳疲繭宜見矜安得畦畹餘種食羽翼生

答崔象之見謝之作

陰風吹沙走長衢方駕往過君之廬主人好事樂閒尚
揖我謂我非俗儒欣然開館掃塵榻語論清簡發不虛
投冠釋帶聊自放安用俗禮空囚拘分朋四座鬪巧夾
聊以勝負為歡娛呼兒稍稍出珍玩瘳器礪礪承枯株
持竿拂壁似有重最後乃掛雙海圖云昔武皇恃威壯
驅石塞海怪可吁鞭笞鬼神各就事簸弄旗幟翻以舒
魚龍驚逃波浪惡左右出沒揚牙鬚但憐物類頗幽怪

畫手安辨曹與吳北軒却下步小徑竹深桂靜何縈紆
我來方冬氣凜冽已愛翠色侵衣裾即看春風撼芽甲
定見紅紫相敲扶乘閒取醉更何適主人勿遽嫌喧呼

同曼叔出郊

驅馬信所適路轉上野橋橋邊春水淨縈回帶平臯兩
崖卉木茂東風澹正搖故叢尚含綠新芽已滿條老小
延我觀名品各異標問翁安致之遠自伊洛郊涉正曾
未幾已覺芳意饒後日風更雨繁紅定飛飄顧謂同行

金尺八
卷一
客有酒頻我招

送孔先生還山

先生樂道者於世澹無欲高風自絕人正行不違俗竭
來城闕遊不受塵事觸目久望林壑駕言反幽築家臨
湓水陽路轉春山曲東風吹百花紅紫滿巖谷蠶桑事
未起農里得徵逐社酒濁易求山蔬晴可劬幽尋月吐
嶺高卧日照屋應念塵中人胡為自羈跼

送謝師直歸馬上作

送客西郭門適與嘉賓遇雜花被原野南盡遠目注撲
撲亂朱紛濛濛疑白霧林下風正柔繁香不飛去日長
人意閒歸騎歟不遽陶然行且歌良愜靜者素却念陌
上人春愁紛似絮

新植西軒

誰謂我圃隘栽插尚盈畝築軒西臨允規地北占酉陽
條散繁華怒甲擎故朽封培童僕勞窺看孩稚走雖非
觀游盛要是吾廬有壤疏人力薄開發定遲後所賴春

風意與物無薄厚居閒日蕭散對此自成偶問我何所
為卦象觀六九問誰之與處達者二三友為生昧機利
於事寡營取但願花常好酌我樽中酒

聖俞約晚見過不至

聞君勅車騎晚駕慰愁獨焚香霽疎箔灑水靜深屋高
懷豈我遺幽思方自續日暮尚徘徊清風滿脩竹

送李廷老歸河陽

愛子良自持不復前日並乃能從古人帖帖事閒靜西

軒雨新足衆藥長條
穎援琴對濁酒盡此夏日永歸心
不可留知子念晨省驅車遵大河
回首望嵩嶺相思倘
以詩見寄慰幽屏

謁孔先生

月出高樹枝影動酒樽處
樹深月色薄稍以燈火助主
人喜我過斟酌亦云屢於時
幸無累所談非近務涼風
自遠生清景澹吾慮方期
西山秋歷覽陪杖屨

晚坐同楊文叔賦

浮雲忽已沒仰視天正碧涼風落我庭燕子飛不息門
無車馬賓巾屨得自適顧慚無所為樂此朝與夕

送樊進士歸寧

狂風吹飛花爛漫天地間春歸花已歇遊子亦云還言
赴庭闈召行色已在顏豈在蓬蓽徵為子駐征鞍豈無
藜與藿與子共盤飧念子久遊行歸得義所安及時道
當進為養祿要干一吟送子詩感惻淚霑翰

鋤園

上天浩無私衆草同一榮青青十步間薰臭相雜并卉
藥數不多十百其品名蔓者善緣附結陰在高薨脩竹
雖自立已復困纏縈其餘叢與株蕪沒不自呈陰蟲穴
其下日夜百種鳴紛然亂耳眼我意初不平朝鋤忽以
靜暮雨且復生自念疲病者莫與地力爭盛衰固物理
安用勞我形

石蘚

託根一何潔冉冉冒幽石不學蘿與薜攀緣走巖壁雲

埋曉愈滋雨洗秋更碧移來色難改足慰思山客

送八哥入都

驅車望平野赤日照萬里子行抱痾瘵無乃困跂履勿
為少別念且為會合喜為我謝親友黃鵠今舉矣

紅雀集汜水羅者得之云來自新羅與聖俞皆

賦

有翩者微禽爾類何穰穰飽飛簷棟間千百齊下上幾
人習汝見於命保無枉爾胡丹其質投翅落異壤殊尤

衆所駭安得免羅網蒼茫海外國長抱萬里想

謝人惠金橘

開奩拜嘉貺俯視目已眩從天落旋星有客射金彈清
香如始摘佳味不少變寄謝嶺頭人梅花慚贈遠

南陽集卷一

欽定四庫全書

南陽集卷二

宋 韓維 撰

古詩

孔先生以僊長老山水略錄見約同遊作詩答
之

羣峯羅立青巉巖中有佛廟名香巖飛泉洶湧出峯後
四時激射喧蒼巖跳珠噴雪幾百丈下注坎險鍾為三

援羅頻瞰石底淨明鏡光溢青瑤函淙沅四走渠為竇
左右吞嚙何其饒緣源散討不知極但見洞穴爭巖嵌
攀藤直上出雲背巖戶秘邃疑神緘仰窺陰洞看懸乳
白龍垂鬚正鬚鬚或凝如蓋覆宛宛或散如指長摻摻
有臺高下且十數如以勢位相臨監平鋪老蘚柔可坐
誰藉綠芻遺不拈北山之石何瑣碎形制一一如鑄鑊
叩之清越諸谷應不意此地間韶咸已霜桂樹垂凍壁
未臘梅蘂輝晴嵐浮屠曰仙好事者奄有勝跡窮搜探

書之遠寄龍山下云此僅止存都凡先生以本來示我
謂我所好同甘鹹相期歷覽在他歲事高意篤非予堪
人生蕭散不易得常苦世累為羈銜吾徒幸當治平日
况又無事於牽貪便須巾車不可後願以几杖從君南

公孫孝子

喪期著常數在古固有之嗟嗟三季後禮讓俗亦衰親
亡有不葬况問功與期公孫布衣士未免寒與饑生兮
已不恤死者吾敢欺孝生因其心禮大實以時挺然顏

俗內獨以古自為蕭蕭天平山松柏有餘悲何以表懿
行刻此無愧辭

下橫嶺望寧極舍

驅車下峻坂西走龍陽道青煙人幾家綠野山四抱鳥
啼春意閒林變夏陰早應近先生廬民風亦淳好

寄題秀州樵李亭

雲水浩無極茲亭安在哉傳名落人間猶使塵抱開昔
為干戈地今以遊觀來物變未始窮千年一浮埃何時

江山秀曠然當酒杯

寄家子震寺丞

時宰高州
洛南縣

高山不可極跨壓梁與秦地產富靈藥巖棲多異人子
才老不用一邑聊庇身方將斂餘閒鍊丹駐形神訪道
風雪夕賞幽芝朮春却顧人間事輕若履下塵曰予雖
世士心獨靜者親相望在千里我車何由巾

重修西軒席上與弟姪皆賦

得高字

明窗散羣帙於此窮曠朝竹色晚逾翠草芽寒不彫志

金匱要略卷二
慚仲舉大節異淵明高孔門有內樂願附斯人曹

嘉樹

殘芳不入眼愛此嘉樹秀青雲重欲垂翠幄遠相鬪輕
涼迎早夏繁影亂清晝茲日更徘徊聊攜一樽酒

西園

西園日修整竹樹相綴屬春華猶未敷氣象鬱涵蓄密
雨昏遠林輕寒傍脩竹於此隱几坐物我同一目弟妹
四五人時來問幽獨我云憂與樂在志所徇逐無厭萬

鍾慊有道一簞足置是不須議春醪滿樽綠

西軒席上探得丁香樹子

物生各有性矯之理宜傷如何生微木揉結始滋芳開
花不滿把瑣碎垂丹黃豈識青桂枝一引百丈彊

同陳道原謁象之

歎炎日為倦休駕一瀟洒風竹來迎人翠色欲傾寫神
交不前約至理非外假甯然天地間誰是忘言者

答曼叔見寄

嘗約遊
高陽

人生風波間觸事喜乖隔前君還里中王事有程格歡
言不一再歸馬已在輓相期高陽秋叢菊手共摘惟時
家多虞伯氏遭遠謫蒼黃走國門下馬拜顏色孤舟千
日宿離思日侵迫還家問生事未免煩計畫自念非世
器身以閒為職不能高奮飛有類籠中翮清霜落衆木
諸嶺應更碧行當脫身去爛醉松下石

和曼叔昆陽城

炎精滅無輝賊莽伺天業帝乘餘運起一劍無所挾皇

天相其怒雷電助震疊尋邑百萬師破碎在俄霎開漢
中興基其猶取諸篋千載潢水上行人指遺堞威靈久
不泯如與耳目接至今古祠上過者猶惴慄荆蕪起寒
色尚想戰血喋屋瓦無遺處秋風卷黃葉

治圃

久雨地氣泄百草日以滋勃然翳我圃積第不可治遂
令蕭艾質唐突蘭蕙姿鴻鵠不肯下跳蛙恃而嘻長林
困纏繞蘿蔓鬱四垂青雲避蒙密白日為蔽虧久與人

跡絕陰有物怪窺涉秋月既仲雍人事芟夷援斧一揮
拂榛蕪為之披俯憐蟻穴亂坐聽蟲響移濯濯行樹色
涓涓佳菊枝涼風自西來衆葉光參差墻堵豁已去南
亭見華櫬却下走直道無復蛇虺疑維此峙嘉珊飲射
之所施循玩失前穢放懷得新怡如昔漢初定禮法壤
不支叔孫剗秦弊樹茅絕其儀皇皇天子庭一旦羅尊
卑表位肅以整衣冠紛陸離圃也不足道拔邪亦由斯
作詩試永歌憤涕下交頤

答楊方叔感懷

吾聞古志人往往感時節所悲非賤貧要在奮功烈子
今才且少方以藝自拔譬如適萬里所利輪與轄翻然
反虛無乃與所事別願持君子嘆勉蹈古人轍

西軒同諸君探題得食奩

探西軒
物為題

簡素與夙尚提携得絃器春芳席餘紅夏木蔭初翠酣
遊性所適甘脆略云備獨愧顏氏子終朝守簞食

聞鶯

雨重朱實垂風生綠陰亂珍禽何所來清響千萬變先
鳴如有得欲去不無戀誰與緩哀絃林間寫幽囀

西軒欲雨同諸君偕賦

輕雷隱何山雲色如黛涌涼滿翠竹浮陰連芳樹重煩
襟一披豁清思欲飛動會待急雨來華觴與君捧

擬杜子美體賦夏日閒居三章

堦前萱草開丹花竹根亂笋生如麻幽居無言感物華
衡門流亂車馬絕遶舍閤閤喧鳴蛙

何所為樂夏日閒手把內篇卧且觀香氣氤氳滿簾間
圓荷貼水雨打亂青蔓挂壁風吹寒

鄰家芳樹牆頭垂羣鷗引兒日夜啼驅之稍去還滿枝

我初厭鷗撓

切女教

吾靜聽之既久理亦齊

夏日覽物思古人三首

張仲蔚

弃置當世事覃思天官書蓬蒿長沒人寂寞守園廬軒
冕非所慕賦詩常晏如

嵇康

脩然柳下鍛豈不遺世喧一忤貴公子鳴絃竟誰寃性
烈才且雋有味孫登言

陶潛

衆鳥依嘉樹想像先生居日哦高簡篇濁酒自為娛世
事不掛口方且愛吾廬

仲夏田家

仲夏農務急老壯紛盈疇上天無愆沴登我蠶與麰晨

興腰鎌出子婦向田頭綠樹遶阡陌當晝豈暇休柔絲
縑滿盆新實已可羞歸來一歡笑卒歲期無憂為民各
有業處世無異謀但願歲嘗然困廩有乾餼糟牀注濁
酒隣里日相求

鋤園寄京師友人

荷鋤中國立飛雨洒清朝黃鸝何處來百轉遶林梢感
彼求友聲慨然念吾交煌煌天子都賢俊相與邀飄飄
翔華纓蹀蹀鳴金鑣良時足遊行高會自招邀誰念張

仲蔚寂寞守蓬蒿

遊城南雙塔寺

軻我郭南門臺殿壓長路青林四回合飛鳥不得度房
掩僧獨禪庭喧鷄正哺高蘿走蒼栢丹花下垂布中園
饒佳果結子滿朝露久從城邑居樂與清境遇坐聽百
禽響日晏不忍去微雨西北來颯爽動林莽歸鞅一回
首孤刹屹當午終期濯涼風杖策縱高步

送催綱弟及蘓支使甥

養病屬南夏日夕偃茅衡足音良可喜況我弟與甥清
風敞閒館竹樹藹前楹一展親愛歡觴竿屢云傾高論
文史間或以政理并念子始服官王事自有程啓告豈
憚煩期不墜厥聲簡書有常畏冒暑各言征雖非遠別
離要使愴我情還歸掩扉坐華月林上明

同陳太丞遊龍興寺經藏院

空堂洒寒水碧楸涼漠漠高眠得珍簟委弃巾與屨薰
風穆然來殿角鳴金鐸清香有時間幽鳥無聲落論詩

愛平淡語道造冲寞非吾方外友誰當共茲樂

和晏相公西湖

鳴蟬忽以急夏景晏林塘不知何山雨颯然送微涼荷
芰忽翻倒四散飄暗香清渠泱泱流碧色浸稻秧零落
墮林實瑣碎開水芳公來必乘晚散步方徜徉簫鼓不
從後筆牘常在旁游魚自成族飛鳥不亂行周覽時景
佳郁穆發新章何意蓬萊士傳貺謬所當時方苦炎暎
汗下揮其滂三復大雅作清風肅衣裳

崔象之過西軒以詩見貺依韻答賦

春陽入我圃窗戶弄喧景幽池明可鑑翠竹列如屏折
枯呈紫莖培塿見紅頰端居閑時序人事謝參省生才
不濟世不如守閭井聊慕莊氏說處陰以休影興來讀
我書興盡煮茗茗崔侯乃同好每見輒自警守道心常
晏感時嘆吐單屢永邊隅事未寧豪俊當馳騁西麾覆妖
巢北指斷凶頸既非二者任且復安吾靜

別曼叔

歲晏多感慨况復餞之子騰裝指近邑弭蓋眷同里日
薄古原樹天寒石橋水毋為少別念春風候車軌

和晏相公湖上遇雨

公堂日多暇薄暮遊清池孤雲從西來若與雲蓋期急
雨亂荷芰紅綠左右披沙禽帶濕起簇簇守前坻烟樹
晦空曲蟬聲寂無遺殘炎一洗濯霽影開林西禽飛還
清波蟬噪復故枝晚槿揚朱華秋草含碧滋篙舟出堤
去微風滿平猗卷幔極長望止見隄與箕舉酒無塵情

慨然起遐思永懷古先訓默蹈通介宜乃知賢哲心所得非遊嬉

答曼叔見寄

日君同里閭杖履數相過靡為不吾咨有唱必君和春風南陌遊炎月北窗卧貪從德義樂不覺歲月破而君宦遊者動足落羈鎖襄城雖近邑去局有重坐子來誠獨難我往義當果時天雨方霽綠樹垂稊稊策馬望城郭青山映烟火解衣塵慮清垂箔月華墮憐君九品賤

志尚勇不挫乃云曹事簡經史日自課出詩且百篇語
法就平安相別不滿歲美譽亦已播顧慚糠粃姿幾不
見揚簸投章匪云報亦用警庸懦

觀飼魚

羣魚戲清川容貌甚融易投餌落其間紛爭忽無次其
來若有召貪吻動如沸波間互出沒似亦夸巧智警跳
鱗迸雪飽泳尾搖翠安知滄海外五牯不可致幸逢觀
者仁不與鈎網值莊生昔濠上嘗嘆天理遂利心一以

發所向固多累我觀雖有殊我得豈云異

答象之謝惠黃精之作

仙經著靈藥茲品上不刊服之歲月久衰羸反童顏巖
居有幽子乘時劖蒼山溪泉濯之潔秋陽暴而乾九蒸
達晨夜候火不敢安持之落城市誰復著眼看富貴異
所嗜口腹窮甘酸貧賤固不暇錐刀乃其干坐使至靈
物委弃同草菅惟君冲曠士敦然守高閒食之易為力
天和中自完故以此為饋其容幾一簞報我三百言浩

金匱要略卷二
浩馳波瀾何以喻珍重如獲不死丹方當煩燠時把玩
毛骨寒他年靈氣成與子驂雙鸞

奉和象之夜飲之什

淫陰泄為雨十日瀉不停蓬蒿長四壁濁潦流縱橫
噉噉鶴羣游閭閻蛙亂鳴端居積幽抱沈鬱久未平
是時俯幾望月魄嚮已盈浮雲失四顧孤輪午亭亭
微風濯炎熱衣中凜餘清起我不暇懶起遙步前庭煩憂忽以去
曠如出幽囹顧謂汝妻子速具煎炮烹同里四五人予

期得邀迎隨時具蔬果飮餽甘與青雖無水陸珍亦足
侑盃觥所期在乘興豈問多品名諸君於我厚匪貌實
以情從容談笑間蕩不見府城有來必虛反觴至無留
行豈惟清言勝或以善謔并高風揖巢許曠論齊殤彭
不知軒冕貴直以道義榮置身豈非德撫事臨若驚上
天作陰沴降水災吾氓芒芒郊野外浩若翻滄溟垣廬
隨波盡稼穡安有成所聞此害廣郡國多所更吾君急
病民定見寬稅征困廩無蓋藏何以活鰥嫠我曾不足

恤方以口腹營念始昔從學潛心於六經頗知聖人道
要在及蒼生胡為取自足而不惟其羸頑然度歲月如
鼃守坳泓中而復自思此其義所寧聖朝盛搜拔列位
羅羣英晨興朝國門冠蓋多於星呈材必夔稷抗議皆
顛闕雙鳬與乘雁未足關重輕奈何不知量欲以愚自
呈退之亦有云其猶進猗苓不如且飲酒茲事未易評

同曼叔遊高陽山

久聞高陽勝近在汝州側跂予三年望我願今卒獲烟

雲函兩山臺殿開半壁解鞍高林下仰視怯登陟蒼松
盤老枝矯矯入簷隙微風韻其上落耳寒惻惻枇杷兩
高樹中國所未識葉間青實駢大與蜀土敵我來暮春
後花草已狼籍不見躑躅紅西巖向人碧出門步榛蒼
微逕不可索援籬下幽澗剥蘚題蒼石鳥啼無定音虎
鬬有遺跡石臺平挺挺野竹瘦歷歷主人尉下邑奔走
困符檄喜我蕭散人幽奇共搜剔息陰時一憩貪勝還
自力歸時山氣冷草露濕遊屐舉手謝峯巒高秋復來

觀

同曼叔遊菩提寺

高城如破崖寺帶喬木古禪房掩清畫佛畫剥寒雨荒
池野蔓合濁水佳蓮吐蕭條聯騎遊淡薄對僧語秋風
日夕好勝事從此數

遊漢高帝祠

平橋架荒塹東上大岡尾岡頭古木合有廟陰其底攝
衣升殿墀龍顏儼當位蝙蝠飛畫帳喧鼠噬珠旒墜不知

誰來祀狼籍樽與簋殘碑壓鼇背上有太和字去此數
百載文剥失所次伊人昔經構視漢猶視彼徘徊懷古
意日暮悲風裏

和崔象之潁橋觀贈陳清臣太丞兼簡陳

崔侯朝從西邑歸面有矜色口且咨云得高士陳其姓
非向可見所庶幾嘗登於朝最吏課一旦去之心甚怕
潁陽古觀三日語坐見月出青松枝深窮性命識原本
論議純一無瑕疵周通旁暢未始極曾不與道相乖違

陳雖平生所未識以子而譽信不疑向風長想日復夜
膏車秣馬吾其西

早登襄城之龍山呈曼叔

烏啼齋前樹促駕吾當西朝從良友別夕赴幽人期方
以會合喜敢曰道路疲予慙昧時利百事弃不為惟有
好賢心未愧緇衣詩

遊首山夜歸馬上作

蒼巖出幾曲此與大道會回看燈火處已在林蘿外涼

風生雨氣清月動山靄漸近平橋路淙淙聞石瀨

泛汝聯句

平居厭城郭具舟泛清汝

曼叔

藍光一水遠鐵色兩崖古

持

日華動中流沙紋亂前渚

光化

湍鳴達公橋草綠襄王

墓

曼叔

園英擁沅沫風葉墮殘雨

持

停橈弄山泉扶杖過

花塢

光化

澄潭數亂石斷石橫顛樹

曼叔

泳波魚鬣舒闔穴

蛙首怒

持

衝雲一雁遠唼行羣鷗聚

光化

村間桑柘春川

潤牛羊暮

曼叔

回頭綠樹失卷幔青峯露

持

尋幽恣盤桓

泊淺屢回互

化

靈草不知名珍禽啼在處

持

夕陽散鳴

鳩荒阡拱游兔

曼叔

挽纜謠歌童簪花立田婦

持

高歌客

自如歸涉人相負

曼叔

青蒲戢戢生紫燕翩翩度

化

雲烟

波底明井邑林外觀

持

欣逢閭里舊愧乏雞黍具緡水

薦困鱗掘石羞山姑

曼叔

繞塘梅實綠冒桂禽殼素我巾

聊一頽石榼煩屢注

持

朱櫻出芳林紫笋侑雕俎高篇

爛珠壁至樂謝鐘鼓

化

嗟予性本隘於世事皆魯便欲

棄簪裳歸去事田圃肆意山水樂脫身塵埃苦

曼叔

此適

誠足尚斯言未宜遽聖神拱巖廟賢俊畢珪組如君之

所懷於時當有補高文贊皇猷大論寧國步無為五斗

卑遂屈萬里舉持明心在知己汗顏愧虛譽時方索大

鼎胡為銜康瓠富貴固衆欲非望久自阻聖賢有遺言

戮力期共赴曼叔嘗聞曰中庸曾不滯出處進當澤生民

退則守環堵所求義與比要在身不汙願無廢吾言於

道其可廢持國

和曼叔靈樹相別

男兒易為別尋尺固可輕今日搵子袂悽惶不自平豈
其道里遠要是隔音形春風卷行迹車馬無留征回首
高陽峯隱約林間明

朝發靈樹寄曼叔師厚

朝發靈樹東曠野陰氣積驅馬入草間左右號鸛鷀重
雲黯玄幕孤月隱白壁鼓危涉塗淖轉側緣溝脉涼風
滿川陸眺覽多所適却想會合樂轉首已成昔諸君豪
俊士經訓飽搜擿上下古與今抗論堅莫敵顧我處其

間傾聽但跼躋校士豈所當直以氣類得譬如禮天壇
珪璧奠且植陶匏以其質並列不為惑論心見表暴吐
口出白黑朝案每共飲夜牀仍抵跡嘲諧間一發清笑
高啞啞自謂得如此至死無厭數敢於百里間而憚轡
與策因詩謝所思酬篇無我默

發襄城寄曼叔

別離何從生乃生歡愛間一登君子堂笑語十日連薄
暮躍馬去飄忽如雲烟毋言懽戚殊世事舉皆然

澧城

駸駸二三騎南並橫山去山窮遠川出始見澧陽樹荒
城蘿薦合表裏無寸土但聞鳥啼聲不見鳥啼處呼兒
開棘扉掃榻坐茅廡清泉給盥濯涼風生仰俯濁醪稍
似佳山巢來近圃始酌薰然和中飲淡無慮案頭羲皇
經編絕幾見補先生發其微大義談四五紛攘自諸家
簡易獨太古形骸非我有冠帶尚誰取道存固匪外兩
致默與語是時季春望山月夕已吐清光出深竹葉上

露如雨寒侵毛骨生思有煙霞舉却念人世間紛紛何足數

九日客散西軒

窮閭車馬散默坐弔孤影烟生竹町深月出茅廬靜道存輕外物心寂喪前境即此之吾生安知慕箕穎

晚過象之徐光亭步月

浮沉閭里間放志謝維紱行貪月色靜歸犯霜華濕寒鼓出城重飛星過樓急却想竹亭下主人猶獨立

曉出郊過方秀才舍飲

浮雲散朝陰初日動晴煦行隨風葉遠去傍田家路人
閒無遽色馬緩有安步遙識主人舍青帘出霜樹

潁橋路中別曼叔

磷磷清潁流中截兩崖斷架橋在城底斗出曠平漫陰
風無邊來左右逢驚轉我行感時節跋馬重為戀雖非
遠別戚所恨良會散却想置酒地松陰野色晚

送寧極還山

晨冰結車轍朔野風正厲君行良亦勤正與苦寒值超
然出門去曾不顧我議譬如雲飛鴻勢不受維繫開籠
恣其往萬里在展翅場功十月畢田家足幽事兒童樵
牧歸荆扉寂已閉燃薪燭茅屋並坐姪與弟自愛村醪
熟或以山鹿饋凍蔬劇青黃寒藥煮根柢從容溫飽間
萬事一無累嗟予不得往注目雲接地

雪中招象之

愁雲合無迹密雪集冬仲狂飈寒空來微泛與風弄打

窗驚暮急壓竹愛宵重明缸照狹室簾押寂不動環爐
四五人頗喜清談縱崔侯著直間默門外車轍凍徘徊
一堂裏有類繭已蛹濁醪誰與酌短褐應自擁何當策
疲馬清賞聊一共

晚步潁上和曼叔

披榛登大堤下視何巖岌野氣忍雪潤河流帶冰澀沙
禽寂不飛行子暮逾急不見洗耳人悲風吹獨立

和曼叔賦斷蓬見別

霜蓬飛無根歲暮隨驚風翻翻走寒野日以去故叢譬
如遠遊子飄泊從西東一感潁上別慨嘆發予衷


雪後觀潁水

微陽動泉脉遠水來渙渙斜日著底明輕冰隨處斷清
函竹陰碎綠與波紋亂安得解扁舟窮源事幽觀

步月

初陽奪殘凜和氣不待春况茲華月白光彩清路塵整
我巾與屨迢迢步城闌仰觀衆星色收芒避孤輪虛無

一境間豈復知吾身嗟哉御風者有待奚足珍



南陽集卷二

欽定四庫全書

集部

南陽集卷

三至五

詳校官庶吉士臣范逢恩

檢討臣何思鈞度勣

總校官進士臣朱鈐

校對官待詔臣胡士震

謄錄監生臣沈啟晉

欽定四庫全書

南陽集卷三

宋 韓維 撰

古詩

答曼叔見謝潁橋相過之什

時寧極先生同往

潁川今古賢豪多後生繼者為誰何
吾交曼叔少挺出力自樹立非由它
潛心直欲到聖處論議不避況與軻
讀書下筆知所趣崇樹蘭茝遺蒿
我軒昂頭角事高大

肯與世俗同其波一從得官坐山縣有如鷺鳥著網羅
朝符暮檄困奔走尚畏官長來誅訶時時矯首塵埃下
窺覩風月偷吟哦我憐軼才就羈絆歲一往視無蹉跎
扁舟遠放汝水岸濁酒暮醉高陽阿前時捧牒來潁上
謹視斂糴譏姦訛官曹寂寞古寺冷况復朔雪飛傿傿
馳書里中二三友固要以義當予過星言整駕夕已至
霜橋晚渡冰戔戔燃薪暖我頻飲我斟酌脯醬調鹽醢
傾壺舉觴紛左右客飽而笑君顏酡危然正論中法義

豆籩羅列陳象犧嘲俳乘醉忽以發駛如鑿水放九河
哀絃孤引四坐寂繼以簫笛相諧和先生久與人跡絕
心如止水形枯柯忽警此樂非外獎不覺撫手促而歌
歸銜絡馬屢見奪欲去未忍還婆娑空堂想見別後意
一燈夜守陳編哦興來落紙成大句勢欲李杜相凌摩
絨題見寄邀以和大江洶湧難為沱短篇澀訥非所報
為我揮筆芟煩苛

答曼叔惠小松之什

蒼蒼首山顛，偃蹇老松亞。清露落其實，翠鬣幽石罅。故人知我好移種，及茅舍誰謂爾幹微。千尺自拱把，生雖春草齊。氣與凡木謝，欲知瀟灑力來對風月夜。

答辛子莊惠梅花之什

東風雪飛度清淮，淮邊野梅撩亂開。想君此時駐征騎，題詩折花思悠悠。裁緘封千里，到此地桃杏芳意都未回。嶺頭奇艷忽照眼，不待驛使傳枝來。清香滿把媿佳贈，欲賦豈敢空銜盃。

和曼叔憩永惠院

立春月在季我時如澁臯驚風揚紅塵頗有行役勞自
駭茲剎勝願言憩驂鑣前對高花繁後視萬竹交虛堂
坐閒敞我輶忘載膏間君戾止日飛雨正蕭條佳景忽
在眼恍如隔晨朝一吟竹邊句清思霽餘飄

謝元道惠桂樹子

洛陽奇卉兼四方妖姿冶艷爭春陽蔚然幽佳獨凌霜
中巖無人閤寒芳山翁窮搜劇青蒼名園得之為輝光

護以雕闌面朱堂葉敷瑤碧丹華揚我今蓬茨蔽短牆
媿爾佳植空埋藏騷人托辭興端良辱贈顧德豈所當
角弓之詩不敢忘與君歲暮揚芬香

同魏進道晚過湖上

春風湖上泮奈此淨綠何平堤看潏灩皎如鏡新磨支
流別而東下走萬玉珂俤俤橋邊柳芳芽綴柔柯中洲
嘉卉繁條甲亦以羅遊禽接翅羽沉沉鳴聲和避人去
稍遠盤空落還多我來日已暮佇視其頃俄羨爾禽類

微終年樂清波

仲連兄治南堂

予生乏時用惟懶性所便強輓亦已退雖鞭詎能前有
園不盈畝正在居南偏荒埋日失治坐惜嘉觀捐伯氏
解官守燕居此回旋芟蕪屬時暇斫枯候春妍面堂一
徑直夾樹蘭與荃畚土執佳卉沼盆注清泉東風過墻
頭朱白爭繁鮮芬香四飄散蝶蜂來飛翾向時疎懶人
游步始連連微勤不少施勝賞得以專才勞拙者逸此

固物理然作詩代俳笑以繼南華篇

南堂席上賦得花樹子

春風日暮急薄寒生小苑羣英不我遺並坐慰幽蹇歡
來引觴酌快甚瓠水建才非孔文舉坐媿客常滿

送子華兄辭家後還都

春鳩鳴桑間初日動原隰馬踏露草嘶人對松風泣茅
廬耿夕返金闕想晨入回首別袖遠惟見飛花急

同子華兄象之宿資福院

風塵暗西郊野寺欣稅鞅虛堂清氣肅偃仰百骸放至
道本自簡欲語不可強夜深松檜寂明月皎相向

三月十三日遊卞氏園

窄徑下深竹有堤平若席開樽陰密樹正見溪水碧游
魚出柳根翕忽無定迹酒行不須遽月色林上白

贈在已上人

人生天地間萬物同一理子今名已是智要獨在已乞
詩東南歸固已謝塵滓東南美林壑佛剎淨如水勉當

窮吾言將有大於此

聽琴

達士寡世慕至音遺俗彈一聞正始奏坐使太古還殘
雪照樽酒晴陽挂簷端曲罷了無得清松空自寒

南溪

長林拂雲根一逕絕城腹荆扉帶翠樾斗下地愈束清
溪自南來勢抵北崖曲清平水流漫東去入脩竹境幽
百物遂魚鳥得所欲况依仁者居不與鉤彈觸有如嘉

賓至相與娛聽囑鳥飛鳴我傍魚泳出深渌薄暮登前
岡四顧山在目雨滋春稼繁風動野花馥達人樂天性
不待外物足遂令茲地勝久不事營築顧我指崖下秋
當結茅屋渠波環古臺輦石坐幽澳霜前復來觀兔肥
山酒熟

陪寧極回馬上作

我有龍陽約垂駕輒復停念與高士期不宜後其行春
風三月尾澗谷花草明尋花踏幽草南出山脚青婆娑

一古樹是曰先生庭館我茅簷下山瓢日夕傾摘林釘
朱實掘竹羞紫萌朝聽谷禽響夜對山月清高論簡以
正疎懷淡無營徒知服深遠難用一善名維也少頑鈍
幾為世網嬰一親德義游頗見外物輕門牆倘可依他
時來執經

九日高會有懷寧極

親賓過我舍置酒樂嘉節不見箕山人坐令歡意歇霜
風吹嘉菊撩亂籬下發欲寄一枝芳雲深去鴻滅

憶寧極

雨滴庵上茅風亂窓外竹繁聲夜入耳欲寐不得熟獨
懷歸田客石徑滑馬足連山暗秋霧一燈何處宿

百合花

真葩固自異美艷照華館葉間驚翅黃藥極銀絲滿並
萼雖可佳幽根獨無伴才思羨游蜂低飛時款款

送三哥守蜀

昔我忠憲公握節臨西州于今三十載餘愛尚應留旌

旗幟獨往山水記同遊一歌緇衣詩涕下不能收

入都席上答曼叔見送

少乏四方志所懷在林立塵埃豈我事義往不得留
進酒長亭上離馬儼行軸臨分子無慘且復相從遊

同晏著作飲薛園坐中賦

鄙生秉愚尚與世實齟齬寄身軒裳內懶惰衆不數
謁來西都游獲并丞相府命駕多從君載酒即得侶洛
水南北涯勝事著自古名園藹相望香刹屹時觀最
憐薛

家溪架閣在西澣渾流激石來知自蒿少雨如從拖樓
下夜聽潮生浦採珠櫻在盤剥玉笋登俎雜花雖云晚
紅白尚可取興來倒冠巾萬事一塵土想在京輦日耳
目塞如堵出憎車馬喧坐厭名利語幸茲清景對醉死
亦吾所

再遊薛園

朱櫻滿芳林夏景始云變郊園掩深寂休駕一來玩殘
花掃空蹊密竹亂清澗置酒臨層軒波禽俯鳴泛南風

揚綃衣微暑忽飄散感此幽思生吾其老佳觀

奉答張寺丞再招遊薛園

名都富游踐所歷多異境貪奇事穹覽一過不再省茲
園獨勤來三晝晝刻永目清林葉淨耳快石泉冷如錢
拾蟹殼比針玩魚影苦耽幽事樂常使歸思耿再招發
新章吾駕促當整

答公懿以屢游薛園見詒

抱痾積閒縱世味頗能淡惟於山水娛自謂老不厭况

茲伊洛間久畜游賞念幽扉深隱竹小約度平塹解鞍
庇清陰拂席見殘艷長溪自南流小閣忽東瞰游人坐
兀兀鳴鳥來泛泛蟹潛石穴幽魚泳柳根暗川童或羣
嬉林女有孤覘醉觴豈留行吟筆靡停占臨歡興何長
遵事迹猶暫伊予志巖壑偶官祿石廩要須三徑足歸
跡便可斂買林接婆娑鑿澗分潏灩田廬常閉門野艇
時放纜聊書平生懷特為異時驗

游龍門詩十二首

寶應寺

林巒若無路鐘磬時出谷鑿石排僧龕研金畫佛屋日
沒上方夕明燈滿雲木

白傳影堂

遠人乘化往生死不為累肖象即當年忘言非翼世一
真祠下觴清風肅然至

石樓

縈回陟雲根結構出石面河傾八灘惡野豁兩崖斷曠

然懷抱開舉酒臨壯觀

香山上方

貪奇忘我勞上上不復省窮遊盡人迹却立看佛頂日
暮不忘歸青山滿烟景

乾元寺

林深寺獨在谷轉路猶邈徐行出萬木斗起造雙閣一
踐清凉境始知人世濁

廣化寺

無畏三賤
塔在焉

卷三
日照香剎端風生石門下精誠或有禱嘉況如可把安
得飛片雲坐看靈澤灑

菩提院望維亭

茲亭何岩崑下瞰伊與洛惟昔定鼎地絕雲飛觀閣姬
公安在哉氣象空回薄

利涉塔院

院有呂文穆讀書
堂利涉法師塔

許公讀書地塵像一來拂門掩僧不歸簷低鷺飛出高
人不可見石塔鎮寒骨

聖善寺

有龍岩
飛石

陟逕九幾盤坐堂聊一息龍去空舊巖崖崩有遺石不
見林下僧鳥啼山寂寂

盧溪

盧攜讀
書處

伊人沒已久溪溜亦如綫淳風揖老僧清陰坐春院始
晤入山深幽林鳥聲變

西溪

我從南嶺來引轡下雲木不知溪流處但見翠滿谷涼

金匱山泉脩篁翳茅屋

潛溪

寺有杜宣猷記具述地主相投所來始于李相藩

李公舊林壑及此與幾授清泉流不竭密竹老逾秀我
慚疎野人來值溪花後

溪出緋牡丹

登上東門

朝發上東門回首望帝宅宮城鎮大野瀍洛去不息是
時雨新霽雲物有佳色嵩峯如迎人百里見晴碧平川
邈如畫日照崖脚赤道傍公卿墳鼇背負脩石蒼苔剥

文字十五尚可識賢愚不復辨零落同一跡薄暮桑榆
風空悲懷古客

孝義橋

殘花辭故都細雨度清洛浮梁拖龍腹徑石亂驚穀山
形豁如對林色秀可握漁子何處去長簪波面落

行慶關

高關拒重阻險狀固天設俯窺洪流奔仰視赤崖絕來
往無時停千載一車轍我行觸飛雨舍轡上嵒嶮筋勞

不敢息黃土百丈裂伊昔六國餘楚漢起相嚙乘時急
形便利害校一髮生民入鞭笞溪谷日流血時平屬真
主汾壤事西謁翠華此回旋萬騎出巖闕斯人一何幸
澤浸厚地徹烜哉行慶名高與日星揭干戈昔不守符
傳今尚撤昏明變夷險在德信前說愧無能銘才弔古
空慘切

和晏相公雪

去年陽氣驕不雪盡冬序今年未開臘已見六花注矜

新忽微飄爭急遂橫鶩浩蕩天地和曠爽樓觀曙蔽日
驚蛾飛集靡紛鶩翥膏潤通大田光輝借前樹縈簷魯
縞輕委庭荆璞聚微生窓戶明巧作樽罍助相公謝朝
柄燕處均養素上嘉時澤滋俯樂心賞遇南閣罷圖史
西亭回杖屨步逕憐缺玉攀林看墮絮長吟寫幽適高
隱動遐慕愧非右席才莫奉梁園賦

徐秘校携酒過池上同賦

得林字

涼風灑疎雨過我池上林感此望歲懷酌酒相與吟殘

花猶動目飛泉時驚心徘徊將歸駕清醉方自今

予復留五

日

之靈巖三首

積陰曠初霽策馬望嵩洛斜日黑雲西回光照城郭牛
散陂草深蛙鳴溝水濁雷遠尚餘音山前垂雨脚
朝行曲河道暮夜不遑止野草熏滿衣山蟬鳴裂耳我
僕痛秋陽我馬困石齒未厭行役勞當前碧嵩起

山闕

景逾變所覽今非昨雲覆嵩頂寒河傾灘面

闕

中塔廟湧日暮鐘磬作延首望洛城氣象

闕

會聖宮

驅車

闕

回首望陵樹岡原何鬱盤左右瞰龍

闕

此延真馭冠山崇朱堂面洛

闕

壁鐵馬有餘怒深沉風塵表想

闕

朝尚

仁儉供養事殊古充邑無豪宗埋枕廢嬪御寂寞歌舞
音飛花亂紅素小臣駭竒觀恍若夢帝所巍巍列聖業
欲頌慙非甫

王家渡

浮舟亂清洛中流望嵩少山晴水光晚藍碧近相照倚
崖晚落日坐覺身世小歎息浮生勞臨風一長嘯

董家園對雨

霏微池上來蕭散竹間度稍遠樹頭花頗沉波面絮狂
收遊騎跡喜動田翁語對酒豈不佳幽寂自成趣

之石窟寺馬上作

今辰忘我勞幽事隨所歷翠麥回一川黃花明半壁山

林樾宿尚老大悲物役便欲從溪僧分居窟崖石

答仲章別後見寄

會合非素期追懽得同好旅情忘鬱約春事入吟嘯子
行反峭輦我去旁嵩少悵望洛陽花金樽不同倒

和晏相公泛南湖章家園過西溪至許家園

杜效

子美
體

湖心點點生圓荷黃花白花滿晴波環堤客樹垂婆娑
魚沉鷺矯各自得人生不樂其謂何南塘過盡西溪綠

上下名園依小曲相君從容來賞矚不驅大旆事喧鬧
直解扁舟作幽獨幕中賓從才且良酒酣落筆摘文章
珠聯璧疊爭煒煌政成禮息無一事明日復此醉華觴

又和春遊

青春之來漫無蹤但見佳氣融融天地百物和風中
輕雷殷出草根綠丹霞散作枝上紅鳴蜂喧空蝶撲地
似與遊人報芳意東城南陌交輪轡朝塵暮雨纔幾日
已見殘花落如積才人生勞苦誠可悲奔走事役無休

時天意以眷使其熙會須舉酒爛漫醉當與不取庸非
癡

和孫廷平坦嵩山十首

古木陰

山木以不材故能遂擁腫陰成衆人息於世豈非用不
用用已成茲理古所重

寒溪石

寒溪水痕落怪石千萬狀須防遊屐滑不碍釣舟漾安

得平若席卧看孤月上

孤竹巔

春山夜多雨點巔生水渙誰與賞幽芳惟有巖中子抱
琴沙上立日暮清風起

垂崖鞭

蟄蛇拖脩尾下映赤壁烟騏驎久不出此物甘棄捐常
恐雷雨至飛起蒼崖顛

雲際鐘

層雲冒諸嶺迢迢起何處稍與暝烟沉還隨晚風度聲
絕人倚樓東風月纔吐

天外峯

孤峯望不極却視天形低天高豈可踰直以雲濛之何
時一掃去高下皎不疑

秋原菊

秋風原上菊百草同蕃滋霜至草已死黃花始離離君
子不獨異顯晦顧有時

漁舟火

拖網潭上歸孤烟出峯背稍沒寒霧中微明秋雨外起
我江湖心鱸魚方可鱠

春溪水

陽生溪谷溫所所冰面破綠隨波色還白放雲光墮野
鷗豈知此終日忘形坐

幽谷泉

鳴泉瀉幽谷谷響聲又激上蔭百丈松下有無數石會

脫炎天屨坐浸兩腳赤

和晏相公觸事成咏四首

梧桐傾鳴鳳鳴鳳邀高翔微蟲縷衆葉玲瓏秋日光本
性苟不易憔悴庸何傷

枿櫚結雙根皮附若毛氄乘秋一剪剝碧葉始竦竦豈
識山中木終年自擁腫

誅茅結園屋日夕所遊造雀來啄其茨蚓出穴其突中
虛尚可托外此非吾保

種竹患不多既多亦為苦長根走地脉凌突敗垣堵物
情有利害為爾執揮斧

南陽集卷三